

H A R A N G V E
D E M A I^{trc.} P I E R R E
H A R D I V I L L I E R
Recteur de l'Vniuersité
de Paris,

*Prononcée par luy au Parlement pour l'V-
niuersité, contre les Peres & Escolliers
du Collège de Clermont, le xxij. de De-
cembre 1611.*

Traduite du Latin en François,
Par F. R. P.



A R O V E N,

Iouxtela copie imprimée à Paris.

II 13 ANOVE

M. A. L. P. I. R. E.

M. A. D. V. I. L. L. E.

Regent de l'Université

Cité de Paris

F

39^e de la rue de la Harpe

THE NEWBERRY
LIBRARY

32^e de la rue de la Harpe


Collège de Clermont, le 15^e de Mars

1612

16/2 ha

Le 15^e de Mars en l'année 1612

1612





A V TRES-ILLVSTRE


Seigneur Monseigneur, Monseigneur
Nicolas de Verdum, & à Mes-
seigneurs de la Cour.

Pierre Hardiuihier Recteur, souhaite
l'immortalité.

VOicy venir vers vous & en public la petite
deffence de l'Vniuersité de Paris, (Equitables
Seigneurs) marquee de vostre nom qui luy
donne renou, plus de lustre & de grace & à l'abry du-
quel elle prend l'essor: & pourquoy non ne volera-elle
pas aux yeux & dans les mains de tout le monde
sous l'air de vos conduittes, puis que vous estes cau-
se qu'elle a rempli l'oreille d'un monde d'auditeurs:
certes i'ay songé fort long temps, si ie deuois esclorre
ce mien fruit & le faire commun, & si ie me fusse
creumoy-mesme, ie ne luy eusse iamais donné la clef
des champs, i'apprehendous pour luy, non seulement
la pince & le controole d'un iugement plus rassis &
plus ferme que le mien: mais aussi l'esguillon & les
piques du temps qui est aussi confus en iugements &
en affections qu'en affaires; mais si tost que i'ay veu
les fauorables rais de ceste Cour celeste, & nommé-
ment le vostre (Monseigneur de Verdum) qui sont
si salutaires à la France, il me semble que i'ay senty

à ij

dans moy nouveaux esprits & un nouveau courage,
 qui m'a fait perdre le premier ressentiment de mon
 humble bassesse, & m'a fait oublier la crainte des
 Censeurs, & des dangers communs: le voicy donc qui
 m'eschappe des mains, ce discours que ie vous pro-
 noncay à l'Audience deuant vos Seigneuries & en
 pleine assemblee, il s'en va tesmoigner de la fidelité
 & naturelle affection que ie porte a mon pays & à
 ma mere l'Vniuersité, il court à l'aduenture, mais
 bien deliberé, vigoureux, plein de vie aux beneistes
 clartez du Soleil de Verdun, & sous les influences
 des autres luminaires de ce grand Ciel François, il
 est aussi naif, aussi franc & candide en sa natiuité
 qu'en sa cōception sur le papier, que lors que ie le tra-
 çois dans mon Esprit. Receuez donc tres-illustre Ver-
 dun, le mignon de Themis, l'oracle de la Cour, l'ame
 du Parlement, receuez vous Iuges incorruptibles &
 gardiens fidelles des lys François les parolles, le cœur,
 & ce qui est de plus, la bōne volōté de vostre Recteur,
 Recteur que ie dits vostre, veu qu'il est le Recteur
 de ceste Vniuersité, qui est vrayement & totallemēt
 vostre, puisque par vostre Arrest elle est demeuree
 ferme & entiere sans tache & sans macule, & d'au-
 tant qu'elle ne tient vie que de vous, ie vous promets
 que ie feray reuiure en ses registres vne eternité de
 iours, vn faiēt si memorable, & par les re-
 mercimens gratulatorioires que vous
 aurez de nous.



HARANGVE DE MAISTRE

PIERRE HARDIVILLIER

Recteur de l'Vniuersité de
Paris.

*Prononcee par luy au Parlement pour l'V-
niuersité, contre les Peres & Escholiers
du College de Clermont, le xxij. de De-
cembre 1611.*

EN fin (M E S S I E V R S) vous auez
exaucé les vœux de nos François, & les
requestes que maintefois les plus calmes es-
prits les plus rassis, & les plus espurés auoiēt
iusques à ce iourd'huy lancé au tribunal de
la diuinité sont renuoyez çà bas, pour rece-
uoir de vous leur plain effect: Les voicy à la
bouche de l'Vniuersité, elle qui trauersce se-
lon les changements & les vicissitudes des
temps calamiteux, elle qui affoiblie & com-
me elangourie par le dol & les ruses des en-
nemis couuerts. La voicy en personne de-
uant vne assemblee la plus auguste & la plus
venerable, la plus entiere & la plus equita-

A

Case

F

39

326

162^{ha}

ble qu'ayt iamais veule monde. La voicy
 elle mesme sur le theatre où la Iustice avec
 la verité deux Sœurs germanes & filles du
 grand Dieu, iouent leurs personnages, thea-
 tre ouuert aux oracles sacrez de la verité
 mesme, ferme au fard, au faste, aux aguets,
 aux embusches des esprits cauteleux: La
 voicy à vos yeux la Reine & Princesse des
 Vniuersitez, l'vnique & chere fille de nos
 Roys tres-chrestiens aux pieds de vos gran-
 deurs; mais non plus de tel port, & de telle
 Maiesté qu'elle a esté iadis; non plus avec ce
 bras d'acier & ce corps vigoureux, nō avec
 ses māmelles qui distilloient iadis vn fleuve
 de bon-heur & de prosperitez; elle n'a plus
 ses yeux esclairants & brillants, ses yeux e-
 stincelants, qui comme des estoilles embra-
 soient de leurs feux les plus massles poictri-
 nes des nations du monde? La voicy toute
 nuë, toute dolente & toute abandonnee,
 qui iette les abois & les derniers souspirs
 dans la poussiere, & va trainant son aisse sur
 le fumier, & honteuse qu'elle est d'vn si pi-
 teux estat, ayant en queue, en teste, en flanc,
 vne grande trainee de ses pauvres enfans,
 encore peu secouruë & soulagee de ses mes-
 mes enfans, c'est en vous qu'elle attend, c'est
 en vous qu'elle espere & repos & soulas au

reſta-bliffement de ſes hon-neurs & de ſes di-gnitez ; c'eſt vous qu'elle regarde les yeux baignez de pleurs, c'eſt vous qu'elle coniu-re comme Anges gardiens de c'eſt Empire, & comme Dieux tutelaires des lettres ; car ſi vos charitables mains ne la retient de ſes lieux limoneux où elle eſt embourbee, & que ſi les oracles de vos arreſts ne repouſſēt l'eſſort des maladies qui luy mangent le cœur & les entrailles, il n'eſt ia beſoin qu'elle ſe cherche ailleurs vn autre lenitif pour ſes douleurs, elle ne doit attēdre en telle ex-tremité & en telle detreſſe autre plus doux remēde pour adoucir l'aigreur de ſon deſa-ſtre, & fomēter ſes plaies que celuy cy, qui au pis aller la Cour de Parlement aura donné l'oreille à ſes dernieres voix, aura ouuert la bouche à ſes derniers ſouſpirs, & qu'elle au-ra rendu entre vos bras, Meſſeigneurs, ceſte ame ſi innocente, ſi pure, ſi Françoisē, en vn mot ſi luyſante de la blancheur des lys.

L'eloquent Aduocat de nos parties don-ne commencement & ouverture à ſon beau plaidoyer par la diſpute qui ſ'eſleua entre Ajax & Vlyſſe pour les armes d'Achille, ce qui me fait tomber ceſte penſee en l'eſprit, que l'Vniuerſité peut à bonnes enſeignes dire des Ieſuites, ce que diſoit Ajax de ſon

Vlyffe; qu'Vlyffe dompte Ajax, il aura ceste gloire d'auoir tiré des armes contre vn brave aduersaire.

Car qui ne void que l'Vniuersité est portée sur les rangs aux armes, aux alarmes, mais qu'elle desdaigne la lice, & de venir aux mains, elle qui est Royale, d'armes Royales, & de race Royale, avec ceux qui n'y a pas trois iours sont deguerpis des Cabannes champestres d'un Hospital, ou de quelque coin d'Espaigne, qui estât surmontez s'estimeront heureux, & feront trophée d'auoir mis en champ clos, en chaleur, en alarme la Roine & la Princeesse des Vniuersitez. Mais de peur qu'en vne si dangereuse escrime des deshonneſtes brigues de nostre partie, & les tours de souplesses en leurs pourſuittes, & vn nombre innombrable de piperies nouuelles, & dont iamais les hommes n'auoient cognu l'vſage de la pratique, me mit quelque terreur Pannique au camp des Academiciens, & n'esbranla leurs esprits comme faiſt vn tonnerre ceux qu'il a foudroyez; voicy que tout ſoudain ou Dieu, ou vous, Meſſeigneurs, auez choiſi à l'Vniuersité vn Aduocat qui a les yeux par tout, qui void de toutes parts, qui darde ſes rayons, qui perce, qui penetre aux plis & aux

replis de leurs destours , & aux plus noires ombres de leurs cachettes, qui tranche de sa langue plus viuement que ne fist Alexandre de son espec, le nœud & l'embarras de leurs plus entortillees sophisteries; qui portant les flambeaux de son bien dire, va guidant les François par des sentiers qu'il a frayé luy mesme, voire par les precipices, les gouffres, les abîmes sans rüe ny sans fonds de la societé des Iesuites; lequel parlât tousiours pour l'Vniuersité, il n'y a que tenir qu'elle sera tousiours ouye & exaucée; lequel debout, elle sera sur pieds; qui plain de vie, donnera vie s'il peut; qui plain d'honneur & de candeur François redonnera s'il peut & honneur & candeur à l'Vniuersité sans borne de duree.

Et pourquoy nostre Vniuersité ne se vantera pas, ne s'eslouyra pas, ne fera pas trophée d'auoir pour Aduocat, vn homme qui cognoit les oracles de la bonne Themis, qui est le truchement & fidelle interprete des plus sacrez arrests, & qui a feuilleté les arrests des Cours, les edits des Roys, & les aduis des sages, & les autres parures du droit Ciuil, dont la robbe d'Astree est parsemée & diapree en guise d'Escarboucles & d'Esmeraudes: il semble que les graces luy ayēt

adiancé sur la teste vne couronne de fleurs de Rethorique, esleué de trophees, & dressé des honneurs d'eternelle memoire; c'est vn fils de Pallas, vn nourrisson des Muses, que les mignardes Sœurs ont embelly des traicts, & des viues couleurs de leurs pinceaux, O Dieux! que nettement, que franchement, & que naïfvement il a représenté la verité; non releuee des ombres ou couleurs estrangeres d'une morte peinture, mais a tiré au vif & au naturel le vray pourtraict de ses beautéz; si bié qu'il semble que i'aperçois desia sa viue image reluire aux cœurs des escoutans par la reflection de l'Orateur, & ie m'assure que parmy ceste presse des assistants, personne ne se treuve, qui ne recoiue en l'ame le sens de ses paroles, ainsi que des oracles de la verité mesme, & qui n'estime que ce ne soit modestie à luy particuliere n'auoir pas esluenté, descouuert, mis au iour plus de matiere, comme il le pouuoit faire s'il eust voulu.

Or quant à moy, (Messieurs) qui m'appreste & m'aduançe pour parler en telle sorte qu'il semble que ie doie pleurer, non pas parler; donner place à mes cris plustost qu'à vn discours, & deffendre plustost la pieté que mon propre interest: i'apperçois en ma

cause vn point qui me trauerse & qui m'afflige, qu'il faut que ie combatte presentement, non pas à des hommes simplement, mais des hommes lettrez, non lettrez seulement mais des hommes Chrestiens, & voire mesme les plus fameuses & renommees compagnies de la Chrestienté. Et peut estre icy les Heretiques, qui ainsi qu'oïseleurs sont tousiours aux aguets pour dresser des embusches aux ames Catholiques prendront quelque suiet de seduire & broüiller les foibles ames d'un menu peuple, mais l'importunité de nos parties nous a reduit à ces extremitéz, qui tant de fois admonestez par amour fraternele de quitter leurs entreprises & les proiects de leurs pretentions, & retenir en bride le vol immoderé de leurs ambitions, tant de fois repoussez & rebuttez du milieu de nos foiers, n'ont peu se commander, ont mieux aymé aux despens mesme de toute charité, s'essancer dans les terres, dans les heritages, & dans les droicts d'autrui, que de brider leurs conuoitises.

Ainsi, Messieurs, outre les indignitez que ils nous font aualer, qui pourroit endurer que maintenant ils taschent à nous faire du mal, non par des espions, non par des ho-

monceaux, ou ennemis des Muses, ou ennemis du repos de la France, mais par vous mesmes, & nous battent sans cesse de vos menaces, vour qui estes les Peres & les Tuteurs de l'Vniuersité, & pensent, misérables, accabler du poids de vos balances, de l'exécution de vos arrests, & de la sainteté de vos diuins iugemens, ceux de qu'ils n'ont peu amortir le courage par secrets monopoles, par stratagemes, & trahisons sourdement complotees? Et d'autant que parmy leurs griefs, ils nous reprochēt la solitude de l'Vniuersité, le desordre & meslange confus de nos classes, la trop grande licence de la jeunesse, comme si c'estoit là maladies populaires du corps Academique, qu'un Roy & qu'une Cour, qu'un Edit, qu'un Arrest, ne seroient suffisants de medicamenter sans le secours de leur Societé, comme si Dieu nous l'auoit enuoyee à ces fins. Là dessus ie fais force, qu'encores que nous voyons que l'Vniuersité en telle extremité, court risque de sa vie, & tōbe en decadāce, il n'est ia besoin des seruiables mains de si reuerēds Peres: car qui seroit celuy qui voudroit appeller des Medecins au secours & à l'ayde de l'Vniuersité, qui ont ce naturel d'auoir à cōtre-cœur, à desdaing, à mespris, toute au-

tre

tre compagnie qu'on sçait auoir conuié, esclous, & enfanté ceste volée de maladie, que nous auons veu fondre & creuer sur nos terres par leurs mauuais desseings, qui sont aux enuiron (gisante voirement sur la couche d'une angoisse mortelle, & qui tire à la fin, leur semble-il) ainsi que ses importuns qui font feste aux vieillards pour attraper leurs biens, & pour se declarer leurs heritiers, qui à peine le mort dans le tombeau, les larmes essuyées, & le dueil acheué, demandét l'arbitrage des funeraillies; ainsi que corbeaux qui vont guettât la proye, vont toujours la gueule bée, & iamais ne retournent, si vous ne leur iettez le morceau qu'ils espient.

On peut voir leurs desseins & sonder leurs pensees, fouïller dans les ressorts & secrets cabinets de leurs cabales par leurs mesmes discours, on les peut voir à l'œil, & les toucher au doigt; si est-ce toutesfois qu'il me plaist bien de vous faire vn recueil, non pas de leurs desseins, mais des euenements, de leurs desseins, source de nos malheurs, veu que le mal du temps m'en donne occasion, & les prises où le sort a ietté ces deux societiez Iesuitiques, Academiques.

Je ne m'arreste pas à leur fondation, lors

que le Iesuisme estoit comme au berceau, qui plus il s'est accreu, plus ont descru les nostres; mais ces rabbais & ces descroissements, ce n'estoit presque rien, ou au moins n'estoient pas de telle consequence que d'arrester le courant de sa gloire, ou reserrer l'estendue de ses bornes, que de ternir le teint & la grace des Muses, & d'abatre le cœur & le soin laborieux des hommes tres-parfaits, qui auoient acquis le comble de toutes les sciēces. Et pour dire en vn mot, c'estoit vne nuée qui ne paroïssoit rien & estoit trop petite pour offusquer les rays d'un tel Soleil qui rouloit dans le ciel de l'Vniuersité. Mais ie viens maintenant à ses mortelles playes, & qui saignent, encores que ces Peres tres-Saincts, & trop bons gardiens de leurs regles, nous ont faict ressentir au despourueu & loin de nos pensees.

A peine l'Vniuersité auoit leué la teste hors de l'orage & la tourmēte de nos guerres ciuiles, & auoit esquiué le naufrage commun, non toutesfois sans rien laisser du sien, & portant sur le sein vne parlante image de ses malheurs, rappeloit les Muses esgarees & vagabondes dans leur pais natal, & maisons naturelles que voicy sur le champ, ces Peres discrets, & qui flairent de loin l'eue-

nemēt des choses, veirent qu'on ne pouuoit
 luy remettre les nerfs, luy remboiter les os,
 & rallier ses forces sans le secours & liberali-
 té d'une Royale main, que toutesfois les
 Professeurs de l'Vniuersité n'auoient ny
 pensions, ny gages, ny soldes, qui sont les
 nerfs de la nature humaine, l'esprit mouuant
 de nos esprits, & l'ame de nos âmes, qui ma-
 nie, qui remue & qui branle tous les ressorts
 de nos subtilitez; les voicy à main ioincte
 & à genoux aux pieds du Roy tres-Chre-
 stiē, luy représentēt que puis qu'il entēdoit
 que le bien de la paix fust vniuersel en son
 Royaume, & que le plaisir de sa Maiesté
 estoit de nous faire sētir l'agreable douceur
 d'une tranquillité à toutes sortes d'hommes
 de tel estat qu'il fust; du moins qu'il fist res-
 pandre & reiallir vne petite goutte de ses fa-
 ueurs & benedictions sur leur petit troupeau;
 Et puis que l'Ocean de tous biens
 couroit par les campagnes Françoises à tor-
 rents & à ruisseaux, il leur fut permis de des-
 bonder la source des ondes cristallines de
 leur doctrine, & les faire saillir au milieu de
 la France, où elles estoient taries; qu'ils y
 estoient portez d'un cœur vraiment Fran-
 çois, prests d'obeir au Roy & luy rendre ser-
 uice, qu'ils ne respiroient rien que par ses

volontez; & qu'ils n'auroiét pour regle que
 ses comandemēs, que sur les autres fleurs,
 ils n'aimoient que le lys; qu'ils bandoient
 leurs efforts, & buttoiét leurs pensees pour le
 bien public, pour immortaliser le nom de
 nostre invincible Roy, & pour accōmoder
 la demeure des Muses, & aduancer aussi le
 progrez des bonnes lettres & de la pieté;
 que les lettres estoient l'ornement d'un
 Estat, le soustien d'un Empire, l'œil & le So-
 leil de ceste Monarchie: que si estoit remise
 ceste profession, que Paris seule ne deuoit
 pas iouyr du bien des lettres, & de l'instru-
 ction de la ieunesse, mais que maintes Pro-
 uinces & maintes villes de ce Royaume de-
 uoient y auoir part; veu que le bien a un tel
 naturel qu'il est meilleur plus il se commu-
 nique, & se perfectionne en sa bonté.

Le Roy tres-bon, & grand donateur de
 biens, les reçoit & les couvre des bras de sa
 clemence, leur ouure sa poitrine pour les y
 confirmer; & deslors il les plasse à la Fleche
 & en d'autres endroits de ce Royaume, leur
 bastit des Colleges, leur fonde des maisons
 qu'il dote, gage, appointe aux despens du
 public ou des deniers Royaux. Esquipez de
 ces gages ainsi que d'armes & fleches ac-
 rees & d'une forte trempe, les voicy à nos

portes, mais à couuert sous le nom du Roy, comme sous la cornette de quelque Dieu, & viennent assaillir nostre Vniuersité, qui estoit toute nuë, sans secours & sans armes, à la mercy du fer & en butte aux tireurs; les voicy qui annoncent & retentissent de langues & de plumes, comme aux sons des trompettes vn labeur gratuit, qui est fuiuy pourtant du gain & des acquests: destournent les enfans, qui des lieux où ils sont, venoient trouppes sur trouppes en ceste venerable assemblée des Muses, qui est comme vne foire où s'estalle & debite la mercerie des lettres, ils couppent les passages par où ils arriuoient en ceste ville. Et puis on s'ebahit de voir l'enceinte & le pourpris de nos murailles si desert, si solitaire, & si abandonné? on s'ebahit de voir la fontaine des lettres sans ondes, sans ruisseaux, sans suc & sans liqueurs? & on ne s'ebahit pas comme ils couppent les veines, & bouchent les canaux où couloit iadis le sang, & c'est esprit vital qui grossissoit ces ondes, & on leur baillera nostre vie à garder apres si lasches tours! on leur demandera medecine & remede à l'Vniuersité! qu'ils ont ainsi blessée, meurtrie & mal-menée de telles maladies! qu'ils volent maintenant de toutes parts à

tire-d'aïlles, & viennent s'efforer sur le tombeau de l'Vniuersité, qu'ils allôgēt les mains pour prédre l'heritage de la deffûte; le cœur panthois luy barroit encore, & rendoit près que les souspirs derniers, & neantmoins engloutissoient desia de cœur & de pensèe son funeste tombeau, en faisoient les partages, & donnoient la curee à leurs souhaits.

Mais, Dieu mercy, ils ont esté deceuz de leur attente; il est atriué que le corps de l'Vniuersité, bien qu'il fust assiegé de leurs trouppeaux, a ralliées ses forces: ainsi que les roses plantees pres des aulx, rendent meilleure odeur; & que le feu enuironné du froid donne plus de chaleur, ainsi l'Vniuersité a soudain ramassé ce qui luy restoit de chaleur naturelle, & s'est trouué des hommes, qui luy ont appliqué contre les influences malignes de si contagieux astres, qui luy mangeoient le cœur, vn lenitif d'vne vraye doctrine & pieté, & luy ont appresté certains ingrediens, composez du fin or de leur sçauoir; voicy donc qu'elle reprend son haleine, qu'elle se releue, qu'elle raieunit; & eschappee qu'elle est de ses dangers, elle a trompé les corbeaux qui espioient la proye, dequoy s'apperceuant les Peres de Clairmont ont leur recours à d'autres artifices,

forgent nouveaux desseins, ou plustost praticquent leur coustume ordinaire, ils se fourrent aux maisons & aux bonnes familles, gaignēt les amitez d'un tas de peuples, font les officieux, les circonspects, & les respectueux, & changent de nature pour un temps, les voicy, les voilà en diuerſes postures, piroüettants avec leurs baise-mains, compliments, accolades; ceste humeur souple & matoiserie qui va, qui vient, qui vire, selon le temps & les occasions, desbauchāt par presents les plus foibles esprits à l'appetit de quelques friandises venuës de leurs cuisines, engeolent les enfans, les appatelēt & les empatelinēt; ils amusent les autres de leurs belles paroles parfumees & emmieles de mignardises & des attraits pippeurs de la papelardise; promettent des merueilles, on les oit, on les croit, on se fie à ces Peres, & on attend l'issuë de leurs promesses, & qui plus est encore, rāschēt à nous ruiner nous mesmes par nous mesmes, nous font porter les armes les vns contre les autres, tirēt de leur costé par dons & par largesses l'esprit volage de certains remuants, qui mangeoient le pain de l'Vniuersité, & qui trop à leurs aises s'estoient refaits gros & gras en bon point dans le sang & la gresse de la mesme Vniuer-

fité; afin qu'à leur moyen le pauvre sein d'icelle fust ouuert à leurs coups & à leurs violences, pour la mettre à loppins & à lambeaux par leurs maximes à deux & à trois ententes, & pleines d'equiuoques, dont ils s'escriment ainsi que de cousteaux qui tranchét des deux bouts; afin qu'on leur ouurit son sanctuaire & ses temples sacrez, où ils pourroient establir leur Empire, commander à baguette, regner les coudées franches, & bastir des Palais pour leurs dignes trouppeaux, où ils pourroient aussi couper la gorge & l'herbe sous le pied à des esprits diuins, qui ne venoient au monde que pour l'honneur, & que pour civiliser la compagnie des hommes, où ils pourroient encore desarmer Pallas, luy oster son harnois, son bouclier, son casque, luy gaspiller le teint, luy barboüiller le visage, & effacer les traits maiestueux de sa face Royale, l'habiller à leur mode, luy donner leurs liurees, en faire vne marotte, vne paillardes, & la prostituer aux volontez lubriques d'vne vile canaille, pour la couuer des yeux, & l'empoigner des mains, & la fouler des pieds, elle qui est Vierge, Religieuse, & tousiours venerable, sacree & consacree à la diuinité.

Et partant ils obtiennent de nostre bon
 Roy

Roy lettres de iussion, qui donnoient liberté de rouvrir leurs Colleges, instruire la jeunesse au beau milieu de l'Vniuersité : mais attendant la veriffication desdites lettres, l'Vniuersité s'y oppose, non moins modestement que courageusement, appelle ses Recteurs, les conuie, les coniuere d'espouser la querelle, & deffendre ses droits viuement & vigoureusement, qu'il est bien raisonnable de recourir aux loix & demander main forte pour ouvrir la fontaine de la Iustice, en distiller les ondes sur les feux allumez de leurs combustions, ou pour le moins accorder ces desordres, & faire en telle sorte qu'un feu si furieux ne gagne pas plus outre. Tandis les Peres de la Societé, ennuyez du delay ne peuuent plus attendre, font venir escholliers en leur College, & mesme les instruisent au mespris de la Cour, malgré vos iugements, en despit de l'Vniuersité, & nonobstant nos oppositiōs, & pour ne pas sembler transgresseurs de vos loix, leur donnent vn sens mystique, n'enseignent pas eux mesmes directement, mais prennent des Pedanteaux & maistres de village, qui n'estoient pas plustost plantez aux grasses plaines du terroir de Clairmōt, qu'ils deuenoient grands clers & grands docteurs, &

estoyent maistres passez en toutes les sciences en vn iour, ainsi qu'en vne nuict viennent les champignons. Quelle merueille donc, si l'Vniuersité foulee, acrauantee, accablee sous le faix des infinis malheurs qu'elle a eu sur les bras iusques au iourd'huy retombe maintenant aux premieres tranches de ses douleurs? c'est pourquoy elle ne redouble pas seulement les accens de ses cris, elle ne deplore pas le teint plombé de deüil l'estat de ses miseres, mais elle inuoque Dieu pere des affligez, elle implore chetive les secourables mains des hommes pitoyables; & encore qu'elle soit aux plus fieureux accez de sa douleur, ou luy manquent les forces, elle crie neantmoins à gorge deployee au secours, on me pippe, on me vole, & on me violente.

A ceste voix plaintiue, voicy venir les Peres tapis en embuscade; les mesmes Peres qui abregeoient les iours de l'Vniuersité font les operateurs, se disent medecins, les conseruateurs du genre humain, donnent des ordonnances, escriuent des receptes contre les maladies, se vantent d'un secret qui peut remedier aux langueurs & foiblesse de l'Vniuersité, & qui la tirera des tenebres au iour, du mal au bien, du tombeau

de la mort dans vn second berceau, d'une seconde vie, & que pour mieux nous faire gouster cc bien, ne desirēt rien tant qu'estre receus de nous, & comme estat des nostres faire bande avec nous, protestēt qu'ils veulent auoir place chez nous, non pas comme les maistres & les proprietaires de nostre champ, mais comme laboureurs pour le mieux cultiuer; qu'ils porteront respect comme vassaux & humbles seruiteurs aux peres de familles, il ne leur chaut à quel prix que ce soit, pourueu qu'ils soient receus; & faites les articles ainsi que vous voudrez ils s'y obligeront par serments solempnels ils s'y engageront aux despens de leur vie, pour conseruer la vie de l'Vniuersité, obeyront aux loix, soubscriront aux maximes, & ensuiuront les coustumes qu'on leur proposera qu'ils prendront recompence de leurs labours, & comme nous instruirons la ieunesse à prix d'argent. argent qu'ils employerōt pour accroistre le nostre, deussent-ils le gagner par rompement de testes, à la sucur du corps, & au trauail de l'esprit.

O les douces paroles, ce n'est que miel & sucre, mais si vous les tastez iusques au fond & les sauourez bien, vous les trouuerez plus ameres que fiel, quoy? pensez-vous (bons

Peres) que nous n'apperceuions que ce pain que vous nous presentez de vos mains gauches, & ne voyions pas ceste pesante pierre, que vous cachez & que vous nous gardez en vos mains droittes, nous estimez-vous encore si louches, si aveugles? quoy? nous tromper encore par tant de faux semblants, & contre-faire encore tant de personnages? & pourquoy tant de mines? tant de matoiseries? on sçait bien qui vous estes, on vous cognoist assez. Voyez-vous le Soleil de ceste Cour qui vous esclaire qui dissipe les ombres de vos tenebres, & qui veille sur vous, & vous changez encore de couleur à l'obiet de nos yeux? ouy il n'y a couleur de si haute veüe qui ne soit propre pour vos metamorphoses, hors mis le blanc qui colore & blâchit les ames des François. Dieu nous a fait la grace de lire dans vos cœurs, nous auons les yeux bons & assez clairs-voyants pour descouurir l'issüe de vos menes & de vos singeries; nous auons en main les fortes chesnes de la Iustice pour tenir arreste les muables Prothees, & les faire retourner à leur forme premiere.

Et pleust à Dieu, Messeigneurs, (ie le dis de bon cœur) que nous peussions recevoir chez nous, en toute seureté, leurs compa-

gnies, que nous peussions aussi leur porter non seulement vn amour fraternel, mais qui plus est vn honneur paternel; mais c'est vne campagne sourcilleuse en montagnes, & vne plaine herissée de rochers mal-aisez à grimper, car ces villes nombreuses qu'ils regentent à leur poste, seruent d'exemple & de preuve euidente, que de les receuoir c'est vouloir l'impossible, tant de grâdes Prouinces où ils sont maistres, tant d'Vniuersitez qui s'ont ensepuelies sous leur ruines, qui les ayant mises bas, pillées, desmantelées, au sac à la besace, ont dressé des Palais de leur debris, & sont deuenus riches aux despēs d'autrui. Ces Vniuersitez ainsi rauagees donnent vne chaude alarme à celle de Paris, & la mettēt aux alteres, aduertissent leur sœur qu'elle deuienne sage à leur exemple qu'elle tire proffit de leurs malheurs, & comme de tout temps, elle les a surpassees d'honneurs, de dignitez, en largeur d'estendue, & en longueur d'annees, elle leur soit aussi superieure en preuoyance, vigilance & courage, & que non seulement elle preuoye prudemment les malheurs qui la menacent, & qui sont à ses portes, mais aussi les repousse d'un masse cœur & resolution plus que virile, & luy font à sçauoir que leur société est

semblable du tout aux plumes d'Aigles, qui mangent peu à peu & reduisent à néant les autres plumes sur qui elles sont mises, ou aux riuieres qui semblent embrasser par amitié les plus voisines Isles, & leur faire la feste, & toutesfois à la longueur du temps les sapent, les esboulent, les minent, & les mènent au courant de leurs ondes.

Mais que nous sert d'ouyr leurs deuis, leur aduis, & aduertissements? pourquoy recherchons-nous de si loin les malheurs aduenus aux Vniuersitez lointaines? pourquoy en faisons-nous vn roole & vne liste? le malheur est chez-nous & au milieu de nous, ils estouffent le cœur; ces mesmes ennemis de l'Vniuersité, sous ombre de remede, luy donnent des bruuages enuenezmez du ius de nouuelles maximes, & font infusion de ces venins en la place du sang vermeil qu'ils ont tiré des veines & des artères de l'Vniuersité: & sur le point qu'ils se vantoient d'auoir vne ambrosie & vn nectar si diuin, des restaurās & mets delicieux pour guarir ceste ericque, qui ne faict que traîner en chartre & en langueur, que gratuitement ils nous les scruiroient sans qu'il en coust rien. Ha meschants! les voicy qui la tiennent à la gorge, luy arrachent la langue,

& luy couppent la voix de peur qu'elle ne crie, creuent ses yeux de peur qu'elle ne decouure les enuahissements de leur surprise, mettent la dent pat tout, & donnent dans la teste, en veulent à la Sorbonne, l'affrontent, la collettent, & luy font boire assez honteusement mille supercheries. Croyez que l'Vniuersité, ouy le grand corps de l'Vniuersité, seroit y a long temps perclus, paralytique, & endormy d'un dangereux sommeil, ne remueroit plus ny bras ny iambes, ce seroit fait de luy, si la Sorbonne n'eust craché ceste rauine de pecquâtes humeurs, qui vouloient empester la teste avec les membres.

Quoy donc? ceste Societé de Iesus, qui se dit le miroir d'humilité Chrestienne, & se l'estime tel, & le vif exemplaire de la vie des Apostres, s'est donc esmancipee, s'est ainsi oubliee de son deuoir; tellement negligé son naturel courtois, que de vouloir courir sus à la Sorbonne, ceste Sorbonne, hélas! forteresse imprenable de la Religion, ferme rampart de l'Eglise Romaine, l'ornement & la gloire de ce Royaume, & l'vnique defence de ses libertez, a osé l'accuser de reproches menteurs, la diffamer, & luy marquer au front vne vergongne remarquable à jamais à la posterité: si leur pouuoir eust

respondu à leur vouloir, appeller ignorants,
 impudents, imprudents, ceux qui sont les
 sçauants, les sages, & les simples du monde,
 ô téps! ô mœurs! tourner à blasmer vne sim-
 plicité au grand scandale de la foy Catholi-
 que, qui donnera subiect aux religionnai-
 res d'en faire feu de ioye, corner & clabau-
 der par tout à perte d'haleines, & le faire im-
 primer, qu'on a faict des prieres & oraisons
 publiques à Charanton, à la Rochelle, &
 aux autres rasières de l'heresie pour la Sor-
 bonne & l'Vniuersité, detestables horreurs!
 comme si la Sorbonne n'estoit pas propre-
 ment ceste Legion guerriere, qu'on appel-
 loit iadis le foudre de la guerre, non pas d'un
 Empereur Romain Aurelius, mais des Pa-
 pes de Rome, qui dardent par le monde le
 feu spirituel de leurs diuins sermōs, qui font
 tonner & estonner les peuples au bruit de
 leurs doctrines, comme au son effroyable
 d'un roulement de rouës, qui garantit l'E-
 glise des fleches acérées que decochent sur
 elle les desuoyez, leur arrache des mains
 & leur faict lascher prise, qui estouffent en
 somme les flambeaux de discorde & de diui-
 sion, que darde l'heresie au sein de nostre
 Eglise: comme s'il se trouuoit d'autres pilo-
 tes sur le rond de la terre plus propres à te-
 nir le

nir le gouvernail, & le timon de la nacelle du Prince des Apostres, que les Sorbonnistes? comme s'il s'en trouuoit de plus habiles, de plus laborieux & de plus exercez au fait du nauigage spirituel, qui peuuent allegrement esclancer les esclairs impetueux de leur tonnerre en la vieille chaloupe des Calvinistes, oster le gouvernail à Calvin, precipiter du mast vn du Moulin, couper les chables qu'empoigne vn de Mornay, & faire sauter Beze haut en bas de la prouë, & faire couler à fonds au gré de la marine ceste battelee d'Huguenots, qui escument la mer des Catholiques, accrocher leurs vaisseaux & s'en rendre les maistres, rompre les auirons entre leurs mains, & s'armer de leurs armes à leurs confusions; & toutesfois ces venerables Peres, selon leur modestie accoustumee, en font leur fable, le iouët de leurs contes, & de lāgues & de plumes, se vantent qu'ils portent seuls dans les plis de leurs robes l'amitié du prochain, qu'ils en sont tous cousus, & creuent en leurs panneaux du desir incroyable de seruir au public, & du mespris des Sorbonnistes vont mendians leur gloire.

Il est ainsi, Messieurs, & nous l'endurons qui sommes Catholiques, nous patientons

D

nous qui sommes François! & nous qui sommes de l'Vniuersité! nous n'en parlerons pas? Catholiques, le sommes nous? où est donc le zele que demande l'Eglise? & où ceste ferueur que nous luy portions au temps de nos ayeuls? François, le sommes nous? ou la fidelité & deuoir maternel deuë à nostre patrie enuers tous & contre tous? & sommes nous de l'Vniuersité? où est le souuenir de tant de priuileges, de tant de passe-droits dont nos Roys tres-Chrestiens nous ont Royalement aduantagez sur toutes nations.

Ceste belle Societé a vn specieux titre, & ne porte en la bouche que l'interest du peuple, que bien public, qu'utilitez publiques, voyla les consequences de leurs discours.

Mais si leurs actions, leurs pensees, leurs paroles ne tendent qu'à ce but, il sera donc permis dorefnauant à des suiets de secouer le ioug de leur obeissance, & rompre le serment de leurs fidelitez; il sera donc loisible de se moquer des arrests d'une Cour, & des Edicts d'un Roy; on pourra librement abuser & piper la grosse populace, enuoyant du Iappon force nouueaux miracles, & donner le martire, le Ciel, & des autels à tels faiseurs de miracles, encore qu'ils

ne soient pas canonisez : bref, renuerfer le bel ordre des anciennes Vniuersitez, non seulement mespriser les decrets de Sorbonne, mais aussi les blasmer, les outrager & déchirer de lâgues; il sera donc permis de ruer tout par terre, de fouler tout aux pieds, afin que ceste ligue partizane des Peres, qui plantent les flambeaux de leur Theologie aux quatre coins du monde, mettent le feu aussi aux hayes & buissons ou est caché le vice, desseichent les relantes liqueurs des mauuaises doctrines. C'est la verité mesme, c'est cela mesme en somme, qu'hier la Martilliere, par qui parle Themis, & qui est vn des ornemens de ce barreau, recitoit d'Ozorius, que sur la fin du monde on verroit naistre vne Societé qui porteroit vn nom tout nouveau, tout estrange, & dont iamais pas vn, iusques à eux, n'auoit osé s'attribuer le titre, qui rabaisseroit bien, comme il parle, le caquet de ces presumptueux Regents, enflez d'orgueil, & bouffis d'arrogance, qui feroiēt perdre les lettres de maistrises & belles doctorandes des gros chapperons fourrez, qui n'auroiēt pas plustost paru sur la terre, qu'ainsi que le Soleil eclipse la lumiere des petites estoiles, quand il se leue sur l'Orizon, ainsi à leur presence les autres cōpa-

gnies, quoy que tres-legitimes, cimentees & fondees sur l'vnion des cœurs, creueroient en peu d'heure, seroient euaporees, esuanoüies, dissipees en fumees, & seroient renuoyees comme bastardes.

Ils se vantēt desia d'auoir acquis ce point par les terres Chrestiennes; & à la verité ils ont chassé les plus beaux esprits; & les testes mieux faiçtes de leurs propres maisons, se fourrants par tout, à corps perdu, & visiere baissée, (comme ils sont fort entrants) ont estouffé au berceau, à la plume, au duuet vne ieunesse qui promettoit beaucoup, les ont enforcelez de leur puâte haleine, ainsi qu'une brouée qui ternist de son hasle le teint & le lustre des perles, ont osté les moyens aux plus lettrez de paroistre en public, & se faire cognoistre, il n'y auoit que l'Vniuersité de Paris qui seruit de retraicte & de lieu de franchise, pour là distribuer à tous venants leur grād sçauoir, & faire le partage de leurs belles vertus: mais voyants qu'elle estoit comme vn rocher qui arrestoit le cours de leurs vaisseaux, (rocher où viennent eschoüer les escueils qui la chocquent) bracquent tous leurs canons, pointent tous les engins de leur batterie de ce costé, s'estimēt trop heureux, si nous faisant acroire qu'ils

nous veulent sauuer, nous conseruer, faire bande avec nous, accablent toutesfois nos veilles & nos labeurs d'un tourbillon d'en- uie, de haine & de rancœur; s'ils contrain- gnent vne fois ceste Princesse des Vniuersi- tez à venir demãder l'aumosne, comme vne pauvre gueuse aux portes de Clairmont, ti- rer de leurs finances, gages & salaires pour nourrir les enfants; ô honte de nos siecles! que tu és miserable pauvre Vniuersité! qui autrefois remplie d'une fourmilie d'esco- liers, te faisois admirer aux nations du mon- de, qui autrefois de si large estenduë te fai- sois respecter, toy, qui par ta vertu, doctrine & auctorité, estonnois tous les peuples, que tu és fortunee d'estre ainsi le iouët, non pas du temps, non pas de la fortune, non pas des destinees, mais de tels Peres, & la veuë du ciel & de la terre. Ha, Messei- gneurs! ha François! ha Paris! les pouuez vous bien voir? les pouuez-vous endurer? pouuez-vous porter l'espaule, ou pousser à la rouë de leurs commencements.

S'il est besoin de remettre les lettres, qu'ô les remette, mais sans blesser nos reputa- tions; s'il est besoin de redonner vie & vi- gueur aux Muses, qu'on leurs redône, mais non pas à la honte, & aux despens des Fran-

çois. C'est à vous, Messieurs, qu'appartiennent ces chefs d'œuvres, acceptez-les, c'est pour vous ceste gloire, & ce titre d'honneur; mais vous Parisiens reservez ceste grace à vostre chere ville. Quoy? vostre Vniuersité recommandable pour son antiquité, & admirable en sa police, & reglement bien compassé de ses classes nombreuses, venerable & celebre en ses temples sacrez, qui regorgent d'hommes tres accomplis, & qui n'ignorent rien, n'est-elle pas capable & digne de telle charge, dites-moy donc, ou est-ce, ie vous prie, que la mer des sciences avec son flux & reflux peut courir plus à l'aise & plus commodement, peut mieux tourner en rond, & desuelopper ses ondes qu'en ce grand Ocean de l'Vniuersité, sur l'eschine duquel, tant de grands personnages singlants à pleines voiles, nous charient les riches marchandises de leurs doctrines, pour en faire trafic & cōmerce par tous les coins du monde au grand bien de la France.

Qui voudroit renfermer le haut pays de l'intellect humain; & les claires fontaines de l'Oratoire, ou coulent les paroles avec les choses; qui voudroit reserrer les secretes riuieres de la Philosophie, qui s'esbranchent en ruisseaux, & les font reiallir au sein de la

nature, ou ceste pleine mer de la Theologie qui n'a pour borne que soy mesme, qui voudroit renfermer mes fontaines, & fleuves en ces petits esgouts de leurs escholes, que vous diriez proprement estre quelque marrests, ou l'eau dort & croupit, que nature à produit plus pour faire veautrer & grenoüiller ces gros esprits de terre, tels qu'estoient ceux de l'ancienne Bœoce, que pour estancher ceste brillante soif des sciences qui consomme les hommes.

Nous voicy en personnes, nous Professeurs de l'Vniuersité, nous voicy tous en armes, le harnois sur le dos, prestz de donner le choc à ces Reuerends Peres, non par ruses, ou par brigues, non par mattoiseries, mais armez de vertu, d'industrie, de doctrine, de cœur franc ouuert, ça qu'on les voye donc sur les rangs ces plus grandes lumieres de leur Societé, (qu'ils peuent auoir autre lumiere que par la reflexion de l'Vniuersité, (qu'on voye ces gens qui fagottent leurs liures, & les entassent les vns sur les autres, ainsi que des montagnes pour monter dans le Ciel de la sagesse, & debusquer de leurs throsnes les Deitez gardiennes de l'Vniuersité, qu'on les voye bondir de leurs cauerne, & qu'ils montrent la patte ces gene-

reux lions, qui iettent le feu par les nazeaux
 & par la gueule, qui ne respirent rien que
 sang & que carnage: on verra si les Geants
 ne craignent pas les foudres de Iuppiter
 Academien; on verra si ces lions affreux ne
 trembleront pas, ne tremousseront pas de
 crainte & de frayeur au chant melodieux
 d'une Vniuersité Frâçoise. Je ne souhaite-
 rois, Messeigneurs, qu'une chose, que les Ie-
 suites missent bas le pourpoint & entraissēt
 en lice pour se battre espees nuës, avec nous
 autres qui sommes en chemises: mais on les
 faiēt combattre eux qui sont plantureux en
 biës, en fiefs, en domaines & en rentes, eux
 qui ont l'aduantage par dessus-nous, & qui
 sont dans le grain iusques à la gorge, on les
 faiēt chamailler avec les gens de l'Vniuersi-
 té, qui maigres, haures, hideux, ne mon-
 strent que les os comme vn Squellette, ne
 font que viuotter, & languissent de faim sur
 les bras de leur mere, quelle apparēce, est-ce
 partie (esgalle? sommes-nous leurs pareils?
 Toutesfois nous voicy les armes dans le
 poing à l'espreuue des coups. nous voicy
 sur les rangs pour faire teste aux escarmou-
 ches de ses cheuaux legers, bien attacqué
 mieux deffendu, qu'on nous laisse faire,
 qu'on nous laisse demeller ceste fuzée, vous
 verrez

verrez comme tout reüssira à vos contentements, au proffit de l'Estat, & au progres des lettres.

Non, non, il n'est plus question de bien discipliner vne ieunesse, en commettre la charge, le soin, la preference à l'Vniuersité, il y va de l'Estat, il y va de la vie de nostre Roy, c'est vn faict qui importe à la Couronne. On dict que Mœcenas admonnestoit Auguste de mettre la ieunesse sous la conduite de Precepteurs qui fussent affectionnez à l'Empire Romain, & de faict ces guerriers, & ces preux conquerants, victorieux du monde, faisoient instruire à part la ieunesse de France en des lieux retirez pleins de bons pasturages, ou peu à peu ils leurs faisoient gouster & naturaliser dès l'Auril de leurs ans vn amour eternal de l'Empire Romain, & s'ils apperceuoient poindre & pousser vn petit grain de liberté Françoisse, le petilloient aux pieds ou le desracinoient; En cas pareil, à qui plus iustement & plus assurément donnerez-vous la charge de la ieunesse, qui groüille dans la France, comme essains de frelons, qu'aux Professeurs de l'Vniuersité, qui n'ont ames & vies, que pour la France? France qui les anime & qui les viuifie comme leur air, leur Ocean, leur

élément , leur Ciel ; & ne demandent vie pour l'Vniuersité, qu'affin qu'elle soit tousiours vn corps de garde , & vne sentinelle, ou mis en garnizon , ils puissent iour & nuict faire le guet , pour la protection & manutention des sacrées Maiestez , pour dresser de bonne heure les ieunes entes à l'amour de l'Estat pour les catechiser en la crainte de Dieu, aux charitez chrestiennes, & nommément en la fidelité enuers les Roys.

Pour ces raisons , nostre bon Roy qui aimoit ses subiects vnicquement , vn peu auparauant que son ame celeste eust monté dans le Ciel , par la playe mortelle qu'il receut dans le sein du cousteau mal'heureux de cest infame traistre : il estoit en parole de remettre sur pieds son Vniuersité, n'estimant pas assez qu'une si chere fille , & si fidelle aux Roys eust la vie simplement , mais vouloit que sa vie fust honorable, magistrale, Royale ; il auoit déclaré sa bonne intention à ce brillant Soleil du clergé François , tres-illustre Prince du sacré consistoire des Cardinaux, Monseigneur du Perron, en qui, comme il auoit vne grande croyance , il auoit mis le soin , il s'estoit reposé , pour eterniser son nom par le courant des aages, & comme il le voyoit iudicieux , & grand amateur des

lettres & des hommes lettrez , il luy recommanda particulièrement l'aduancement & l'expedition de cest ouurage.

La voicy, Messeigneurs, la voicy elle mesme, qui se presente à vous la larme à l'œil, & vous coniure tous par les ombres sacrez de son feu Roy, nostre second Sauueur & Redempteur qu'elle n'en vienne pas là, que de my-partir sa gloire, auoir des compagnons & des partageants, & appeler à l'ayde ceux qui sont si hauts & puissants seigneurs qu'on ne les peut borner, si honorables qu'on ne les peut imiter, si remplis de merites qu'ils n'ont pas leur pareil, faites que ceste Vierge demeure immaculee & impolluë, & qu'elle soit capable de receuoir vn iour l'agrecable rosee des douces influences, que doit verser la main de ce grand Cardinal, vray nourrisier des Muses; & qui, luy mesme seul, les ressusciteroit, s'il arriuoit qu'elles fussent au tombeau.

Elle ne demande pas pour ses chers nourrissons des recompenses telles qu'une rançon de Roy, qu'un Peru, ou que des mines d'or, non pas des Baronniez, des Comptez, des Abbayes, elle ne brigue pas des successions, elle n'est pas Charlattanne, elle n'a point de charmes, elle ne iette pas de pous-

dre aux yeux pour espuiser les coffres, ou i-
rer des presents de la main d'un chacun, &
prendre à toutes mains; seulement vous sup-
plie en toute humilité qu'elle ne croupisse
pas en l'ordure ou elle est, qu'elle, qui tant
de fois a esté deprimee, ne soit pas oppri-
mee, elle qui tant de fois a esté combattuë,
ne soit pas abbatuë sans espoir de ressource;
qu'on luy tende la main pour lui tirer la teste
hors du fumier, qu'elle ne cōbatte plus sans
armes avec tant de gens-d'armes, qu'elle ne
face iamais accord & alliance avec ceux,
qui malins lors qu'elle choppe vn pas, luy
font glisser le pied; & sur le point qu'elle
tombe, precipitent sa cheute.

Mais quant à vous, beaux Peres, Peres de
modestie, que ne vous tenez-vous en vos li-
mites? quel prurit vous demange? qu'elle si
grande enuie d'enseigner la ieunesse vous es-
point, vous chatoüille, vous fait sauter aux
nuës? pourquoy venez-vous pondre dans
nos paliers, & couper sur nos œufs si opinia-
strément? est-ce pour nous esclorre, des Es-
preuiers, des Milans, des Autours, au lieu
de vray François? que si c'est vostre enuie,
& vostre affection, pourquoy faictes-vous
guerre si rude & si cruelle? pourquoy sans
dire hola, enfoncez-vous ses portes à grands

coups de marteaux ? en quoy vous a-elle offencé pour la harasser ainsi, la tirailler, & la persecuter, la tirer aux cheueux, & procurer sous main sa perte & sa ruine ? allez donc ie le veult bien, si vous pensez rassasier vostre gloutonne faim des moëllons & des tuilles de nos maisons, abbatez-les si vous pensez estancher vostre soif de nostre sang, ouurez, percez, & espuisez nos veines, emportez tout, saccagez tout, pillez & rauagez comme à la picoree ; emportez chez vous les cendres & les tizons de nos embrasements ; au moins si vous auez quelque ressentiment de la deuotion de nos ayeulx, si vous estes touchez de quelques consciēces, pourquoy renuersez-vous les mauzolees d'éternelle memoire de nos ayeulx ? si vous aués encore quelques fleurōs de lys grauez au fond de l'ame, pourquoy assaillez-vous ceste vniuersité, qui deffend viuement les droicts & priuileges du Roy des fleurs de lys ? & si vous honorez sa Maiesté d'un amour cordial, pourquoy venez-vous fondre sur son sang, sur sa race, & sur ces creatures, comme sur vne proye ?

Le veult que l'vniuersité se soit veüe reduite en si piteux estat par le malheur du temps, par le flux & reflux de nos guerres

ciuiles & specialement par les supercheries de nos coniurateurs; mais la faut il reguarir, qu'on la reguarisse donc, non par la main de ceux, qui la feront languir à hocquetz & à sanglots, d'une lente poison au lieu de luy donner vne forte rheubarbe, d'aseront apres sur le tombeau de la pauvre deffuncte, & se piafferont d'auoir affiné le peuple François, bontif, persuasif, & qui croit de leger.

Est-il donc vray qu'il la faille tousiours fouller, si iusques auioird'huy elle a esté foullee? la faut-il derechef matter & mattiner, si elle l'a esté par cy deuant? & la faut-il bannir pour ce qu'elle n'est plus dans leurs esprits? esprits, ou sont flestries les odorantes fleurs de la doctrine, & où sont bazannez les lys François. Je me pisme, Messeigneurs, quand i'entends les sospirs, les plaintes, les griefs de l'Vniuersité; ie meurs à petit feu quand ils viennent sonner iour & nuict à mes oreilles & troublent mon repos; faut-il que ie m'en aille, dit-elle, & que ie rende l'ame sur les bras de mes domesticques, sans pouoir florir comme le reste du grand corps de l'Estat? Quoy fourrager mes terres à mauuë, à mon sceu, me raur l'heritage que m'ont laissé mes peres, qu'on m'arrache des bras mes fauoris, qu'on les enterre vifs?

Adieu donc, ô Paris, Adieu mes bons
 enfants, Adieu pour vn iamaïs, vous qui
 auez conquis l'Empire sur les lettres, & qui
 estes logez dans ce petit recueil du monde
 vniuersel sauuez vous mes mignons, puis-
 siez vous estre heureux, & viure en allegres-
 se, face le Ciel benin que ceste ville vous de-
 meure immobile, & que mon cher pays me
 demeure obligé; ie me retireray & m'en iray
 si loin qu'on ne me verra plus; baste, si ie ne
 puis cultiuer, pollicer & regler cest Estat de
 bonnes lettres, aumoins n'y verray ie pas
 regner vne asnerie, vne ignorance & vne
 barbarie; ô mes vaines couruees qu'estes-
 vous deuenues?

Où estes-vous allees mes esperances? vous
 m'estes eschappees, ha mes belles pēsees vous
 ne m'auiez de rien seruy, c'est pour neant que
 ie vous ay pourpensees, sera-il dit, que moy
 qui courbé soubz le faix des guerres ciuiles
 reprenois haleine, & ne respirois plus que
 l'odeur de lys François, pour porter derechef
 dans mes flancs maternels tant de bons ci-
 toyens que j'ay stilez, façonnez, aguerris
 pour tenir rang en ceste Republique, & que
 j'ay esleuez aux plus honnestes charges, plus
 apparētes, & les plus releuees de ceste Cour,
 qui ay plongé les ames heroïques des Prin-

ces, des Roys, des Empereurs, dans la mer
des sciences; fera il dit qu'apres auoir faict
tant de bien ie ne ressentie pas au fort de mes
angoisses la secourable main de tant d'Al-
telles, de tant de Seigneuries, de tant de
Maiestéz? où est ce Parlement a qui i'ay don-
né à tetter mes mammelles? ou ces grands
Caualliers qui s'estoient enroollez soubz la
banniere de ma Pallas, pour esbaucher les
premiers coups d'essay de leurs apprentissa-
ges? ou le parler François? ou les esprits Fran-
çois? Hé! quel mal ay ie fait pour estre con-
damnee, non par quelque destin ou diuine
ordonnance, mais par l'aduis de ceux que
i'ay nourris à receuoir au sein les poisons, les
assauts & les tranchans cousteaux de mes
ennemis iurez?

Mais pourquoy m'arresté-ie si longuemēt
à escouter les plaintes de l'Vniuersité? ne
voy-ie pas à mes yeux des Deitez qui ne sont
pas contraires à ma fortune, qui me fond si-
gne d'esperer mieux, de filer plus doux, re-
calmer mes baüillons, & rasserenner l'œil? Je
vous regarde donc, Messeigneurs, vous qui
estes nos Iuges incorruptibles, ie me tourne
vers vous, & avec moy toute l'Vniuersité en
corps fiche ses yeux sur vous, & sur le rang
que vous tenez icy, regardez en pitié la fille
aînée

aisnée de nos Roys tres-Chrestiens, qui prosternee à vos pieds a telle confiance en vos faueurs qu'elle s'asseure, que plus ses ennemis gagneront de credit enuers le populaire par l'importunité de leurs brigues, & le patois de leurs mugueteries courtifanesques plus vous les assisterez de vostre auctorité.

C'est ce qu'elle demande, non a gresse d'argent, qui n'y est que trop court, non par corruption, elle n'y employe pas sa dignité qui est toute affoiblie, elle ne faict pas montre de sa grandeur par l'entreiect de si longues annees, mais elle faict voler le gros de ses prieres, elle verse des larmes, baisse la veüe, estalle ses haillons & l'équipage honteux des gueuseries dont ils l'ont affublee; la voicy destrouffee pour attendrir vos cœurs; voyez comme hardiment elle se iette icy au sein de la Iustice, & implore vos bras iusticiers, & vos mains droiturieres, d'auoir compassion de ses miseres.

Ie suis icy, Messeigneurs, Deïtez que i'adore, Deïtez venerables de ce temple sacré, tutrices inuincibles des libertés Françoises, ie vous y coniure tous au nom de Dieu, par les ombres heureuses, & à nous fauorables, du grand Henry, qui fut iadis le Pere de ceste

France, par ses dernieres volontez, lesquelles vouloir enfreindre, c'est vn peché, vn crime, vn sacrilege; par le sang de nostre Monarque Louÿs, que vous avez en garde; par la vie immortelle de nostre tres-sage, tres-vertueuse & tres-puissante Royne, a qui vous deuez donner toute assurance; par ce premier Prince du sang Royal que vous voyez icy, ce tres-illustre Prince, tres-digne reietton du tige des Bourbons; par le salut que vous procurez à la France, par l'affection que vous luy portez; par l'honneur que vous luy rendez; mesme par vos enfants, dont principalement il s'agist en ma cause: le vous coniure encore vous-mesme par vous mesme, si vous voulez vous immortaliser, & bu-riner vos noms aux temples de memoire: ostez, ostez pour vne bonne fois le maniment des lettres à ces profanes mains, & rebaillez l'Empire des lettres à la Princesse des Vniuersitez, & remettez les filles entre les mains de leur mere, & ne permettez pas que la taye & chassie des nouuelles doctrines couure les prunelles, le blanc & le cristal des yeux François, baïsse leurs regards, ou les face voir troubles, ne vaut-il pas bien mieux que l'Vniuersité sorte encore hors de foy, & tressaille de ioye au recit de la Cour,

au bruit de vostre nom, & au seul souuenir de vos loüanges? vous cueille des lauriers verdoyants à iamais, pour courronner vos chefs, graue à lettres d'or vos grands merites sur la voûte des Cieux, que tout le monde serue d'Echo à sa voix, qu'un nouuel ordre de Religieux tous frais paistris, & de nouuelle impression, qui ne retiennent rien du naturel François, & se dispensent des regles monasticques, pour se vanter par tout, corner & trompeter à pleine teste, au peril de la France, à la ruine des Muscs, quoy que s'en pleignent toutes sortes d'Estats, tous monasteres, toutes professions, que par vos iugements, leur Diue Societé auoit entré chez nous, que l'Vniuersité avec les bonnes lettres auoit donné du nez en terre par vos arrests, & que l'air de vos souffles auoit flestry, fané, pourry ce troisieme fleuron des lys sacrez.

Si toutesfois vous auez arresté en vous mesmes, auez deliberé de permettre aux Iesuites de disposer de l'Vniuersité à leur plaisir, au moins, au moins, Messieurs, desployez nous vos pourpres, estendez nous vos robbes au prealable, receuez dans vos bras ceste Vniuersité, qui va tomber, receuez les soursirs, & les derniers hocquets de vo-

stre mere qui est en agonie, & qui tire à la fin,
 & apres telle cheute arriue qui pourra, fa-
 che pourtant le peuple aux siecles a venir,
 cognoissent vn iour ceux qui viennent apres
 nous; non pas par nos histoires, non pas par
 le tissu de nos narrez, qui pourroit bien, peut
 estre, viure l'aage du monde, mais par vous-
 mesme; apprennent pour iamais les nations
 du monde; entendent ces nouuelles encore
 vn coup, & s'en estonne QUE NOVS N'AVONS
 PAS MANQVE A LA REPVBLIQVE, MAIS QUE
 LA REPVBLIQVE NOVS A MANQVE.

F I N.